

ГАБОР КОСТЕЛНИК ГОМЗОВ:



# МОЙОГО ВАЛАДА

Удкиски венъец



Макладом Автора — В печатні ОО. Василяни в Жовкві 1904



Digitized by the Internet Archive  
in 2016

<https://archive.org/details/zmoohovalalaydy100kost>

ГАЗОР КОСТЕЛНИК ГОМЗОВ:

# З МОЙОГО ВАЛАЛА

« КИЇВСЬКИЙ ВЕНЕЦ »



ЖОВКВА  
Печатня ОО. Василян  
1904.




Прим валалу слова тоги,  
Прим народу мой —  
Гоч я одбил ше од тебе  
'Ще я зато твой!

Перши слова и труд перши  
— Шицко, цо сом мал,  
До тих я паперох зязял,  
И тебе сом дал







# I.

Слунко горе, витрик шуци, житко ше колѣше,  
А шкорванчок з нього вильет и лъеци вше више.  
На початку уж зашпивал гласом як од меда:  
Раз жалошньє, раз весело — описац ше нье да.

Лъеци горе — аж под хмарки думаш так високо,  
Лъеци, лъеци лъем кущикчо запатри го око.  
Шпиванка му з так дальєка люпко розльетує,  
Цале мирне, цихе польо гуком напольшє.

Кед до волѣ ше нашпивал, вец ше назад врази —  
Спушує ше и трепеци з кридлами трешаци.  
А кед блѣско уж є жеми — заднѣ глас кед пуши,  
Ягод стрела фуркньє долу — лъем класок засуши.

За шпиваньом заш шкорванка препилка ше глаши,  
В зарньє кучи тайньє скрита, бо ше людзох плаши.  
Путьпурутька, путьпурутька глас прериваючи,  
У гук ей ше польом лъее вше одглашуочи.

Ой то слухац, мили Боже, то ци шерцо треше,  
То щашлѣвосц, то рай прави — до нѣба це нѣше.  
Позабуваш шицки болѣ — спознаваш милоту  
Премирного там живота и його красоту.

Уцих уж и глас препилки, а лѣем коса бринѣ,  
Утнѣе житко, кед пререже, як струна задзвинѣ.  
Човек коши, класки валя — жена му одбера,  
Хлапец мали пред ню идзе — порвисла пресцера.

Еден откос кед виженѣе, зос косу на плѣцу  
Назад придзе и руки му други откос мецу.  
Слунко грѣе — його зноѣ, алье нѣч то зато,  
Зной кирвави то ци хлѣбик, то ци праве злато.

Под тополю стриблолѣстку-у погодним хлатку,  
Цо ей лѣсца так блѣскаю на слунковим златку,  
Стоѣ там им гомбалочка, при нѣей дзивче кучи;  
У гомбалки дзецко малке — роботнѣк ш' буц учи.

Шедзи дзивче при золнѣци, братка колѣскуе,  
И бави го, гутори му и мило милуе.  
Кед заплаче, кед постанѣе вон кус процивлѣвим,  
Весела му вона шпива гласом жалошлѣвим:



»Нье плач злате, нье плач мали, мили соколѣку,  
Пошол оец твой зос дому на лъехким конѣку;  
Пошол оец, пошла и мац, хто це будзе ховац,  
Хто укладац тебе будзе — писми пришпивоца?

Ей та виховаме крашње ми тебе малого,  
Кед мац придзе, даме ей це, легиня красного.  
Гаѣ, буѣ, гаѣ, гаѣ — ти таше чучало,  
Ша ти ше уж од мамочки за досц нацицало!»

А в'но слуха як шестрички польом глащок гуѣ,  
Як му вона прелюбезна шпива гаѣ, буѣ.  
Слуха, слуха, нашмее ше — ангелок постало,  
И у хлатку под гомбалку вещей нье сплакало.

Док з оштрима 'ще зарями слунко пригривало,  
По високим док ше ньебе ище прехадзало,  
Там под хлатком вони двойко на саму шедзели,  
З милованьом и шпиванку ведно ше бавели.

А кед кущик охладнуло, спод гомбалки вишли,  
По сцернянки там дзе коша-гу мацери пришли.  
На сноп шедли, з мацеру ше кущик росгварели,  
Вец з пальцом указуюци слунечко патрели.

А в'но цихо уж запада и помали шеда,  
 Там дальеко аж за жему друге место гльеда.  
 Цали запад од злата ше у червенѣ блѣска,  
 Льем дагдзе ше хмарка била указуе з нѣска.

Онѣмуе глас уж ташкох, а други ше родзи —  
 Шпиваюци ше зос поля утрудзени ходзи.  
 Раз зачуеш льем сам еден гласок од дзивчатка,  
 Па заш вецей гарла сгурча — дзвинѣ писма слатк

Кочи льеца, льеца хитри, а зарно ше кива,  
 Та и воно ведно з людзми шпиваночку шпива:  
 Шуци, сичи, класок з класка на други ше валя,  
 Ягод габи по пребистрей води цо ше шаля.

Уж сгинула задня заря слунечка ясного,  
 А цма за ню польетуе ньеба белавого.  
 Наквицену гвиздочками билострибернима  
 И мешачком блядих рогох шмяту уж жем прима.

Пришол газда уж зос поля и челядз му цала,  
 Запрашена од работи ше поумивала.  
 У прикльеце док им дакус окрипи наваря,  
 Позбера ше ище вона, кус ше поросгваря.

Пошедаю кой на лавки, кой около пеци,  
А з стола им од лампочки зарѣ видни лъеца.  
У ѣх шветлье так шедзаци заприповедали  
О роботы, цо наютре робиц би ю мали.

А дзе баба старих рокох и стриберних власох  
Приповедац започала о предавних часох,  
Дзеци сцели би ю слухац — уха напинаю,  
Кед зачую о шарканьох, мамки ш' пригинаю.

Вше плашлѣви так на облак вецка закукую,  
Кридлати ше там шарканѣ чи нѣе указую.  
Па заш чи нѣет дзивей дзивки, вше ше оглядаю,  
И на бабу зачудзеним оком попатраю.

У дѣтку ше пребилому шерцо розограло:  
Гей док млади вон дараз бул, як ше то орало;  
Древени плуг — штири конѣ под нѣм ше зноѣли,  
А стиковац вше ши мушел — аж ци руки мълели.

Дзе машини теди були? — Та аж до єшенѣ  
Вше на гумнѣ брадла стали 'ще нѣе потлачени.  
Дзекеди шнѣгови ташки уж з хмарох лѣтали,  
А вони 'ще полни шопи нѣевятого мали.

Кед пак почньє вон о Прайскей, очи му зашвица  
И стари му — уж зморщени зачервеня лѣца:  
Гей Боже мой, як там страшньє, горко войовали,  
На кльєцаци як у Бога помощи гльєдали.

»Ньє так то ше,» завершує »дзеци мойо мили,  
Тераз жиє, як ми дараз на тим месце жили.  
И робел ши и зноєл ше, а твойо ньє було,  
Бо з дерешом ише пану до коша спаднуло!«

Так ше в'ни сприповедаю, и за стол шедаю,  
Альє газда дзе и слуга — єдно место маю.  
Помодля ше и зос истей мисочки черпаю,  
Єдна мука и исти зной — розлуки ньє маю!

Стол припрости там ньє позна презвирства гадного,  
У тей хижки фаризейства ньєт анѣ жадного;  
Ньєт там пихи, ньєт гордосци — там понѣзносц влада.  
Там худопство од богатства у чесци ньє страда.

Кед и глад уж засицели, од стола ставаю,  
Хлопи 'ще до хлѣва пойду, статок припатраю.  
А мац дзецко миле бере, на сон го уклада —  
Положи го на посцелку, ручки му посклада,

И в'на модлѣ, воно за ню прегваря помали,  
Так модляци и »Отче наш« цали докончали;  
Ой як воно з побожносцу мацер попатрало,  
Ой як воно зос любову Бога вигваряло!

Кед биш видзел ти тот квиток премирного мира,  
Яка у нѣм ище малким превелѣка вира,  
Як му очко таке бистре и шерцо малює,  
И ньевиносц його чисту як му указує,

Заньешена би ци слиза око наполньела,  
Луша би ци од любви витаргнуц ше сцела,  
И през росу ти би патрел, як ангелка того  
Слова пребиваю дзвери нѣба високого. —


Цма уж вшадзи, лѣм єден ше пламенчок яшньєє,  
То ци заднѣ як зорнѣчка, цо ш' задня шветльєє.  
Остатнѣ вон ище блѣска, патри — випровадза  
На починок, а вец и сам на сон цемни схадза.

А нараз и вон ошльєпньє, и спац польєгаю,  
Ой добре їм вимучени уж одпочиваю.  
Мирни, цихи вноци теди часи завладаю,  
Лѣм когути пишни дзєгдзе дараз зашпиваю.









## II.

А кед жито шушаце ше зос косу покоши,  
Кед за роси повязане до крижох ше зноши,  
И овес аж под пазухи з главку ше пишаци  
Порипе ше — вец ше суши на гарсцох льежаци.

Од зарна ше високого жем уж почисцела,  
и ровнѣну наоколо през конца створела.  
Мог биш видзиц и швет шицок, алье ньебо пада,  
И дальнѣ ци вид зос хустку белаву заклада.

А там дзе округле з жему ведно ше збочкує,  
През числа ше габох билих бистро прелѣвує,  
Па ше блѣща, па трепеца на слунку младому,  
Же то баба кози гонѣ, нашо гваря тому.

На дальеко швет ци шицок морйо єдно красне,  
Стриберно ше прелѣвує, як стрибло є ясне,  
По нѣм як кед би плѣвали чамци за чамцами,  
Шорую ше марадики за марадиками.

Части кочи лъехко лъеца уским дильовами,  
З своѣма ше ширцом поля глаша черчаннями.  
А за собу шиву хмару праха охабаю,  
Аж швицаце зос нѣм слунко циньом закладаю.

На сцернянку коч кед сцигнѣе, кочиш на стояци  
Наоколо густих крижок коч назад навраци,  
И при марадику конѣ гласом установи,  
Крижни древа з дескох сцагнѣе и их приготоуи.

Вец нѣвеста оштрих рукох вше сноп за снопами  
На коч руца гу човеку з желѣзним видками  
А вон снопи од нѣей прима, добре их намесца.  
Док их верхом нѣе накладзе — кельюгод ше змесца.

Па кед уж на крижни древа клаше намесцели,  
Қоч удесно кед викладли, крашнѣе завершели,  
На нѣего виду, як на стреху горе пошедаю,  
Так шедзаци гу брадлом ше помали врацаю.

Други заш на празно иду, на дешички шедза,  
Пак що скорей, бо нѣет кеди, бежаци заедза,  
Скорку сланѣнки прехваца и хлѣба билого,  
Док нѣе дойду дрингаюци до поля свойого.

А кед дошли, коч и вони з зарном наруцали,  
Шедли горе обидвойо — брадлом ше врацали.  
Дому ньешка зарно свойо мало хто звожує,  
Мало хто на коньох свойо жито отлачує.

Гей а дараз богатство ше шицко дозвожело  
На гумньє, и вец на коньох шицко ше тлачело.  
Уж вщас рано з брадла вельо снопи нацагали,  
Уже долу, клаше горе гумном поставяли.

И по клашу штири конѣ прездзень вше бегали,  
Челядз цала вельораз го прездзень преврацали,  
Вельораз зос нього сламу обиту зберали,  
Па ю вец на брадло горе деском винашали.

А єден стал и гнал конѣ на слунку оштрому,  
Льем калап крисати кущик хладок правел йому.  
Вечаром заш натлачене з граблями зогнали,  
И до длугей ноци вяли, до грота сипали.

А teraz ше брадла пиша польом виставени.  
И дзвигаю так високо глави завершени;  
Ягод чупор гускох билих, цо уж зльетнуц маю,  
Так на слунку з дальєка ше и вони блѣскаю.

А наскоро медзи нїма загурча машини,  
 Чарним им ше димом скуря високи комини.  
 И ягод на квитках пчоли кед ше позбегую,  
 И зос свою муку слаткосц з квета визберую,

Пак вец вимучених кридлах з квеца позльетую,  
 До кошнїци мед свой ноша — и ю збогацую,  
 Так и людзе по брадлах ше велї посходзели,  
 И зос зарна богатого заренко лунели.

Млади и моцни легинїе веселого шерца  
 На брадлье ше по подену коло снопах верца,  
 Пак заджобню за сноп чешки, льехко го руцаю,  
 А вредни дзивчата сноси од нїх одбераю.

Ясна страшни зос гурчаньом клаше отлукую,  
 Сламу длугу з окруцаньом льехко вируцую,  
 А хлопи ю зос видлами велї причекую,  
 До рогох ю так стирчацих вецка викруцую.

Заренко ше пак по трешки з рошгами роштує,  
 И до мехох очисцене чешке ше сцадзує.  
 Дїдови заш мехи вяжу — и їх вец мераю,  
 Па попритим з пальенку ше дакус наздравляю.

На коч мехи кладу полни — накладу до верху,  
И кед руши коч ше, шкрипи под так чешку терху.  
А до дому кед ше придзе, вец ше мехи ноша  
По драбинки — и сипу ше до велького коша.

Златне кошом ше глѣбоким жито розлѣвує,  
До стрехи го пребогате верхом напoлнює.  
Гей прешумньє зос златом ше тераз плаци плаца,  
Стораз вецей и шаце ше а и мука враца.

А кед швето и нѣдзеля по кошачкох придзе,  
Легинь кажди рано станьє, и за коньми идзе.  
Вельо их ше там на сцерньох, вельо посхадзаю,  
Чутки себе на пуканьє добри назбераю.

И роскладу зос терекох пламень так червени,  
Ягод на виходу слунка шветом роздрильєни.  
И з устами розгорену жирячку роздую,  
А на чуткох заренка ше пуком роспукую.

Кед ше конѣ им як бугни уж трави напасли,  
Пламень вони розбовчани, жирячку загасли.  
Па вец конѣ випутали, дзехтори прагали,  
Други на коньох шедзаци дому ше врацали.

А ешень уж помальочки богата приходзи,  
Полни гамбари и пойди за дарунки водзи.  
Коши верхом наполньени — пойд ще лъем пражньее,  
Чека жадни кукурицу, цо по полю зрее.

Людзе уж ще сготовели, и ламац почали,  
Красни чутки ягод руки на руки складали.  
И вец до кошара сипу — його наполнюю,  
Кошар вежню на медзу го полни висипую.

А коч идзе коло цирку и громатки збера,  
Же би нье спадали, поньва под нїх ще пресцера.  
Вец помали дому вожи, на єдну громаду  
Шицки чутки гу тернацу зос кочох ще складу.

А кед вечар мили придзе и цмасте змерканье,  
До двора ще позбераю вецей на лупанье.  
Па гоч и цма — вони видза, лампа им швицаци  
Зос облака зарї руца — и цма так ще траци.

Шедза в'ни на мехким лїсцу чутки лупаючи,  
Приповетки души слатки приповедаючи.  
Олупани чутки кажде окреме зруцую,  
Па хто вецей их налупа, вше ще обегую.



Шедза вони шицки дома на грутки родзеней,  
И до гроба сво'го нѣгда од нѣх нѣ схабеней;  
Шедза вони шицки свойо, шицки там зобрати,  
Нѣ ширцом велького швета за хлѣбом розгнати.

А кед Бог да добри рочок, па грозно белаве  
По конаркох лоза зродзи и полне и здраве,  
Бударе вше по винѣцох стари похоцкую,  
Препатраюци чокоти барз им ше радую.

А коч полни до винѣци младих ше привеже,  
З бичаком гиризди кажде зос конарка реже.  
Нарезане у мирицох на коч вец зношую,  
У гордове, кед ваполня, до дому звожую.

Боси ноги вец белави бопки прицискую,  
Чуря чурком спод нѣх капки, гордов напальною;  
Чуря капки, и богатство цихе приглашую,  
Чуря слатки, нѣзбачлѣву шашлѣвосц зношую.

З погариком газда слатке винко зачерпуе,  
Перши погарик подзвигнѣе и шумнѣе винчуе:  
»Слава Богу — того року крашнѣе ше зродзело,  
Цале нам обисце биле з шицким збогацело!«







### III.

Шнѣх завее з густих хмарох — зрадную ше дзеци,  
През облак вше патра, крича: гей шнѣх пада, льеци!  
А вон пада як кед би ше мотилѣ роєли,  
И зос билима кридлами мило трепецели.

Пада, пада и напада скоро до кольена,  
Цали швет ци єдна плахта било обильена.  
Льем хижочки, древа голи над ню вистирчели,  
И под билу шапку нєми на биле патрели.

Перша ноц за першим шнѣгом хижи барз прибрала:  
Цомплѣ длуги ягод швички стрехом повишала —  
И облаки зос кветами красним росквитала,  
Води бистри лядом глатким позамарзовала.

Аж спод хмарки на жем жимну шкорванчка здрильела  
И пищочка його гласни нємо оньемела.  
А препилку зос класатих зарнох вируцела,  
Охабиц тот край мушела, па ше одсєльела.

Комини ше так пишацн хмарно закурели,  
Вонка жимно      пеци цеппи хижочки сцепльели,  
А на жиму дзеци мали повибеговали,  
Чи би могло уж ше шлѣскац, ляд препатровали.

Алье ище вон преслаби и як скло ценючки,  
Нье шме на ньго стануц нога анѣ помалючки.  
А кед го дас два, три ноци моцньейшим напярвя,  
З веселим го вони словом радосно поздравя.

Як по мангелю ше по нѣм гладким забегую,  
И шлѣскац ше в'ни дзекеди кояк видумую.  
Еден вес ше з єдну ногу, а раз нье засцигнул,  
Спагнул сегинь      па цо скорей заш ше назад дзвигнул.

Льем попатрел на гвиздочку, цо ше заблѣщала  
Под главу му, цо ю вона ляду змалювала;  
Влапел кус процивно шапку, цо му одлѣцела,  
Чомже вона буц заглавком глави му нье сцела?

Нѣч то зато, було      прешло, себе подумує;  
Та през муки ньет науки      и дальей пробує.  
Други кус ше нашмеяли, па як катонаци  
За шором ше заш шлѣскали весело кричаци.

А там заш саночки криви до рукох сциснули,  
И спод шопи на двор з нѣма на шнѣх вибегнули.  
Та давно ше вони тому, давно радовали,  
Давно санкац ше по шнѣгу — давно уж жадали.

Гей а тераз то ше цага, то шо паньски вожи,  
Дзе нѣе може єден, двома — вецей ѣх ше сложи,  
Пак ци лѣца ягод ташки, шнѣгом поскакую,  
А дзекеди боме в'ни ше и попрерацую.

Лѣца ѣм ше червеньєю, руки им жимньєю,  
Кус задую до нѣх, па их дакущик сцепльєю.  
А кед збача, же су гладни — кед ше набегали,  
Аж теди ше до хижочкох цепних поврацали.

Нач палати ѣм високи, кед нѣски хижочки  
Таки су им прещашлѣви, таки прелюбочки?  
Та у нѣма шицко маю, цогодльєм им треба —  
Шицко злато: цеплу стреху и кромпкочку хлѣба.

И легиньє уж спод шопи санки вицагнули,  
За санканьє облюбєне ведно ше спрагнули.  
Коньом красним, гриви крашньє позаплѣтовали  
З пантлѣчками — и швицацо уж их вичесали.

Виведли их з хлѣва вонка и уж запрагнули,  
Красни штверци и зубадла на нѣх уж складнули.  
И на предок вец до санкох вони пошедаю,  
А на задок ше дзивчата млади намесцаю.

»Дзеци мойо« мац им добра шумные наказуе  
И зос златним своѣм словом з устох прегварюе:  
»Же би ви на себе шицки добре мерковали,  
Барз нѣе гоньце, же би сце ше нѣе попреврацали!«

Стоя конѣ запрагнути — швитки як татоши,  
Цо за нѣх приповедаю, же их кридло ноши.  
Стѡя шумни и пишацо глави виписую,  
Як школяре по таблѣчкох цо их виписую.

Стоя в санкох бесноноги и нѣевиробени,  
Та бугери аж по нѣма трепца намесцени.  
Стоя вони — алье ледво — з копитом дупкаю,  
Кеди капуре отворя, пажерно чекаю.

А нараз капуре свойо кридла роширела,  
И зос двора на драгу им драгу отворела.  
Чмигнѣе батог — скоча конѣ з санками лѣецаци,  
А з нѣх глас ше розльет гласни валалом гурчаци.



Зашипивали полним гарлом хланци и дзивчатка,  
Шерцо младе їм шпиванка вешелї преслатка —  
И од нього през уста ше люлко вицагує,  
Шицок валал своїм гуком — медом наполює.

Льєца вони так на санкох мило шпиваючи,  
А старши их попатраю їм завидзуючи;  
Слаба баба здихла себе на то подумала,  
Кед и вона так ше дараз на санкох санкала.

А даєден найташ, як их збачи уж здалєка,  
Зос лопату полну шнїгу скрито их причека.  
И кед приду уж гу ньому, шнїх вон на нїх руци,  
А шпиванье ше претаргнє од шерца шмеючи.

Та їх млади чарни власи нараз побильєли,  
А лїца им так вервени 'ще почервеньєли.  
И шмеяци єдно друге вєц ше отрепую,  
А попри тим ище баржей з звиском пришалюю.

Льєца конї як ластовки, гриви им пирхаю  
И пантлїчки запльєцени воздухом льєтаю,  
А санки ше вше за нїма скоком заруцую,  
И зос шора вше на други льєхко пребегую.

Уж превезли в'ни ше млади по шору каждому,  
И врацаю ше весели гу свойому дому.  
Он'емел їх звиск н'емирни, сгинуло шниваньє,  
А л'єм чуєш кон'юх л'єхких черкоткох черкан'є.

Уж су бл'єско — а пред хижу мац их випатрує,  
Застарана з пошмихом их тераз привитує.  
А в'ни ище на остатку єдну зашпиваю,  
И до двора сцигну — з санкох уж позихадзаю.

Кед ше змерка, а дзивче ше до газдин'ї збере,  
Свою кудзель и гарсц влакна под пазуху бере,  
Пак вец видзе зос капурки — и на драже чека,  
Кед обачи, же пайташка идзе єй здал'єка.

Привитаю ш' ведно иду до газдин'ї нука,  
Гей а ту уж полна хижа и превелька гука;  
Ту кольєскох од кудзел'ї, вреценох фуркан'є,  
Ту веселе и легин'юх, дзивчатох шмеян'є ;

Ту шпиванки н'епрестане преслатке гурчан'є,  
Ту єй ягод ташка кридлох до н'єба л'єтан'є,  
Ту в'на младе шерцо з огньом сво'їм распалює,  
Ту в'на любов — радосц його гласом прегварює.

Ценким гласом дзивче водзи языка свойого  
Красне слово — шпиваночку до шерца любого.  
За ню шицки мило гурча з полнима гласами,  
И ей шерцо так провадза з своѣма шерцами.

Шпива дзивче, гонѣ кудзель — влакно припушує,  
А златна ше ей нѣточка з рукох вишлѣскує,  
И округло на врецену ценка омотує;  
Шпива дзивче, гонѣ кудзель — нѣтки приспорує.

Уж досц позно, и мешац ше бляди указує,  
Же ѣм исц до дому треба, сам им прегварює.  
А вони го послухаю, уж ше позбераю,  
И нараз ше од газдинѣ з праткох росхадзаю.

Виду з двора, иду дому мирно, шептаюци,  
Даєден ше легинь скрие — груду на нѣх руци,  
Па од мира и шептаня звисок ше розльєє,  
Цо ш' плашлѣви, бояжлѣви на остатку шмєє.

На нѣх мешац зарю свою ясну росипує,  
По билим им шнѣгу драгу дому указує,  
Бистрим оком ѣх провадзи, на нѣх ше огляда,  
И зос нєба у тим часу гу нѣм зисц зажада.







#### IV.

Стало рано, красне рано — з сна ше пробудзело,  
Стало рано. красне рано — оком препатрело.  
Стало воно обльечене у пребилу шмату,  
Чека нъесцерплѣво красни вечар и ноц шяту.

Дзеци як ше лъем пробудза, уж мацер питаю,  
Чи готови в'ни торбички за шпиванье маю.  
А у пецу пука прuce, пламень забовчує —  
Чека гладни на бобальку, цо ше вишулькує.

А дзе дзивче крачун прави — його наквицує,  
Па яблука и орехи златком озлацує,  
И вец их з медовнѣками на ньго привишує,  
Льедво, льедво и радошньє вечар випатрує.

Уж ше змерка, а в'но з хижи вонка шмеце нъеше,  
Шерцо му ше треше --- слуха откаль пес то бреше?  
Та за тим ше воно гласом з родней хижи ода,  
За нѣм з дому оцовского пойдзе ягод млада.

Хижа било вибилъена, крашнѣ спораѣна,  
А на столѣе уж ше швици швичка запальѣна.  
Ой та як би там нѣе було шветла горяцого,  
Дзе ше причекуѣ, жада шветла предвичного?

Браца з брадла до золнѣци слами нацагали,  
И презлатну ю и оштру до нѣей завязали.  
А кед ше уж и пацери дзвоном одзвонѣли,  
До приклѣта в'ни гу дзвером сламу намесцели.

Вец до хижи шицки войду, найстарши останѣе,  
Вон ма принѣсѣц сламу нука, зос ню винчованѣе.  
А на дзвери вон задурка — войдзе з крочаями,  
Откриѣ ше и прежегна — почнѣе зос словами:

»Нѣешка Христос, Цар нѣебесни, мал нам ше народзиц.  
Нѣешка Христос, Цар нѣебесни, мал зос нѣеба сходзиц,  
Нѣешка мал вон нас откупиц, зос гриха вибавиц,  
Нѣешка за нас жиму церпиц — и себе преславиц.

Так нам пророк Исаия давно пророковал,  
И Емануилом його славно наволовал:  
»Уж нам Дѣва« — прегварюѣ »породзела Сина,  
Бога, Цара предвичного, — Мария единая!»



А я кущик вам домашнѣм принѣс оштрей слами,  
Росипем ю по тей хижи, най будзе под вами,  
Же би ви ше у яшелькох Христа споминали,  
Як на слами на нѣго жимней вол, ошлѣк дихали.

И зос сламу принѣс я вам красне винчованье,  
Од народзеного Цара шашлѣве жаданье,  
Же би ви в радосци тоти швета спровадзали,  
И вельо ѣх — и весели, здрави дочекали!»

То вон шветочно, ангелски з устох прегварюе,  
И золнѣцу уж розяже — сламу росипуе.  
Од радосци од нѣбесней шерца задуркую,  
З милоту ше и шятосцу якуш прелѣвую.

А на очох од радосци слива препатруе  
И наококо стоячим око напoлнюе.  
Чесни оцц в чoлье стоѣ, винчованье вита  
И йому радосц на лѣцу зос слизу открита:

»Радуйме ше, нѣшка шветло у цми зашвицело,  
Радуйме ше, нѣшка дзецко швет тот вибавело,  
Радуйме ше и вешельме, до нашого дому  
Прильцеци красни гласи вибавльеню тому.»

Так прегвари вон як газда, и за стол шедаю,  
Дзеля вечеру медз собу — яку уж ю маю:  
Ту преслатки мед ше жовци и риби печени,  
Капушнѣки и бобальки — таки омильени.

Шедза старши так за столом — и иста ньевеста,  
Хтора други дзень мац нье сце шедзацого места.  
Дзеци мали льем по слами люпко ше валяю,  
По цалей ю хижи вони з рук'ми намесцаю.

Орехи им мац подзелѣ, яблула червени,  
Гей яки ѣм тоти дари мѣли, барз злюбени.  
Вежню пранѣк, гу ношки го стола приложели,  
И по нѣм ше з орехами радошнье бавели.

А нараз ше под облаком глас якиш зачуе,  
»Дате ся навеселити?« — так вон припитуе,  
»Даме, даме« — дораз на то з хижи ше озива,  
»Народил ся Исус Христос« — глас весело шпива.

И у час тот ягод кед би кридлати ангели  
Зос ньеба ше високого ту на жем спуццели,  
Пак под облак каждой хижки ше понамесцали,  
И дзвончковим своѣм гласом дзвонко зашпивали.

И у час той цали валал нъебесни оргони,  
 Цо зос своѣм гуком гурча на гони и гони.  
 И з нѣм и голому прцу душу улѣваю,  
 Мертве, тварде и змарзнуте на живот дзвигаю.

И у час тот цали валал тайна шята, слатка, —  
 И у час тот цали валал росквитла загратка,  
 Дзе лелия, гвоздзик, ружа гарлом зашпивали,  
 З побожносцу, з шашлѣвосцу, з любову спахали.

Повед биш охабя тераз ровнѣну глѣбоку,  
 Дзе бул заб'вени од швета — нъевидни му оку,  
 Пак ше на брег — хмару дзвига з малима хижкамі,  
 Цалим шветом шветло руца з другима гвиздамі.

Пать улѣцом з торбичкамі іду двое браца,  
 Под сушедов, под родзинов облак ше навраца,  
 И шпиваю як шкорванкі пісмі мілі, шяці,  
 А по шпіваню вінчую жиченя багаты.

У сушеда, у люцкаго през облак ім даю,  
 Дзе грайцар, орешкі дакус — кельо надумаю.  
 А родзіна препозна ѣх, до хіжы іх вола,  
 Наўка, іўка аж гу сто́лу — до хіжнаго чола.

Па заш шпивац и ту муша — гей алье иньшаки  
Ту дарунки як в люцкого, бо ту и петаки  
Били и блѣшаци цвенкню до мешка спадаю,  
Яблука, колачи скоро и места нье маю.

А там з гвизду троме иду било обльечени,  
На глави им як коруни шапки положени.  
Аж до хижы зос ню красну вони ухадзаю,  
При шпіваню и кльекаю — з шаблю ше збиваю.

А вифлеем уж барз ритки — дараз вецей було  
Гей на жалосц трацы то ше — старосцы спаднуло;  
Легиных заш вельке коло, аж иду зос мехом,  
Же би места направели яблуком, орехом.

Льем пред гевтот облак станю, дзе найташку маю,  
»День божого нараждения« гарлато шпиваю,  
Па на миски там орехох до грота сипаю,  
А дагдзе их ище з капку вина привитаю

И пинтовка вец ше вожи од руки до руки,  
Вельо их ест, док пресухнѣе, нѣе барз треба муки.  
И кед шицко вицадзели, з двора вихадзаю,  
»С нами Бог« зос шицку моцу улѣцом шпиваю.

Уж кус сцихло, глас оглухнул, лъем »с нами Бог« дараз  
 'Ще загурчи по валалъе, и заш сгинье нараз.  
 А през облак червенкасте шветло руца крашнѣе  
 Швичка нѣшка спац нѣе идзе, анѣ ше нѣе гашнѣе.

Нѣбо яснѣ и прибранѣ з велѣма гвиздами,  
 Трепецацѣ и швицацѣ зоз их зарйочками. —  
 Ой а чи нѣет в тим презчислу горе медзи нѣма  
 Гевтей гвизди, цо з зарами милорадоснима


Тром царом народзенного Цара прегваряла,  
 Цо ше так над Вифлѣѣмом з дальека блѣщала? —  
 Крижик златни на верх турнѣ шветлом забовчуѣ  
 Од мешачка — и як гвизда з зарю стрепецуѣ,

Указуѣ, прегварюѣ над валалом ясни,  
 Дзе лѣжи дзецочко малѣ - його Вертеп красни.  
 А за гвизду тоту людзе гарню ше, сгартаю,  
 »Снами. Бог« з полного шерца радосно шпиваю.

Полноц славнѣе и саночне задзвонѣели дзвони,  
 И спод хмарох розбег им ше глас в дальеки гони.  
 »Слава Вѣгу на висини« — гук лѣта и лѣта,  
 »Радосц, радосц — народзел ше Откупитель швета!« —







## V

И фашинги прельєцели мили и весели,  
Кед вечаром вше по праткох прибранци ходзели,  
Кед улѣцом дружба ишол з ручнѣком червеним  
Длугих ройтох — и калапом крашње заквиценим,

Па на свадзбу вон у хижи з стариньским словами  
Шветочно родзини волал зос их дзеэчочками.  
И наскоро звадзба була — гудаци заграли,  
Шицки ту ше вешельєли — млади танцовали.

А тєраз мир и обумар валал так кричаци,  
Льєм дзекеди цихосц прєрвє глас жєнох трєшаци,  
Цо гу крижу каменому вечаром ходзели,  
Шєптаючи Роспятого кед цихо модльєли.

И заш рано кед когути будни зашпиваю,  
И кед кочи дрингаючи валалом черкаю.  
Черча кочи, а на нѣма плуг, кольчата, брана,  
На польо ше орац идзе, дзе сцєрнь нєе орана.



Конѣ з коча на до плуга дораз ше запрагню,  
Чмигньє батох и глас скричи, штверци ше нацагню.  
А плуг ошгри бразду зарип — глѣна вискакує,  
По блѣщацим жельезу ше лъехко ошлѣскує.

Идзе орач так за плугом и прициска ручки,  
Глѣбоко пушел, па конѣ иду помамалючки.  
На концу вон их навраца, и заш брадзу другу  
Лапа, а жем вильетує по глаткому плугу.

Па так оре, док сцернь цалу нѣе попреврацує,  
Дерляча вец чешка за нѣм ганти розбивує.  
Кед ше зровна, шач зос руку зарно росипує,  
А за нѣм церньова брана шаце загребує.

Шее шач зоч полну гарсцу, и по жеми ходзи,  
Красна йому дума душу — же ше оздаль зродзи,  
Наполньела и гадала на Бога доброго,  
Ой да Вон, па вльеце будзе клаше з зарна того.

А яр млада рошньє, рошньє — уж од сна ше будзи.  
Папри шветом, а вон як би бул ей ище цудзи:  
Древа голи, 'ше през лѣсцох, лѣем пупольки мали  
По гранкох спод твардей скорки повикували.

Наоколо цале польо ище грудa гола,  
А яр ю зос благим слункои на квитанье вола.  
Жем ю слуха --- и травки ше по нѣей зжельеньели,  
На жельени уж пажици крави ше гоньели.

Па кед рано ше розвидня, краваре пукаю,  
А газдинѣ з двора крави на драгу пуцаю,  
'Ще их скорей до жохтара вони подоели,  
На валов их випуцели — и так напоели.

Мурча крави по улѣци, краваре з пшичками  
З валалу их шицки гоня — пашу пажицами.  
За нѣма кондаше трубя и швинѣ сгонюю,  
А газдинѣ з кармикох их вонка випущую.

Па кед того шицко свойо рано спораели,  
Ткац ше вец до хижи вони гу кросном врацели.  
И чолнок помедзи нѣткох глатки преруцую,  
А дзеци уж з сна станули — цивки насикую.

Нѣтка ше до нѣтки збива, и круг ше зродзуе,  
Па ше шари коло кроснох полни омотуе.  
А вец кед ще цали витка, вода ш' на ньго льеє  
Там на гумнье, пак наскоро як шнѣх ше бильеє.

А по гумнѣ коло платна жовца ше гушатка,  
Бежа били и таркасти зос квочку курчатка,  
По дворе их вона шицким, по загради водзи,  
З квочканьом их там зволує, дзе зарна находзи.

А вони ше сцу поламац — так барз ше збегую,  
Пак и в'ни, дзе квочка джубе, коло нѣей зджупкую.  
И вец кед ше наджубали и понаѣдали,  
Квочки ше под кридла мехки вони поскривали.

А так за мамочку свою и дзеци здихую,  
Вше час, кеди гу нѣей приду, льедво очекую.  
Миле лѣцо мацерине у очох ѣм стоѣ,  
И болѣ им шерца воно любежлѣво гоѣ.

Вше в нѣдзелю пополадню нѣвеста з дзецочком  
Прибраим до билих красних — а 'ще крашим очком  
До мацери — аж сцу зльетнуц — так ше понаглаю,  
А мац мила и рейтеши льедво их чекаю.

Ту при златей ше мацери шицки, шицки зиду,  
Гоч з Збегньова на Барище треба — вони приду.  
Кед ше дакус погосцели, вецка прегваряю,  
Цо през тидзень в'ни на шерцу зачуване маю.

А на драже жени шедза на стольчкох так малих,  
Приповедаю о койчим — о часох престалих.  
Кед дзивчата край нѣх преїду з шущацїм сукнями,  
Осудзую вони сукнѣ з драгима хустками.

У конку лєм єдна шедзи цемна а и слаба,  
Приповеда, кадзи уж ю нєсла морска габа,  
И толкує шяти места зос Єрусалиму,  
Цо их очми 'ще патрела — и з велького Риму.

Прегварює, а жени єй на слова меркую,  
У шерцу ю и барз люба а и ю жалую.  
Медзитим и хлопи вишли уж и пошедали,  
О газдовству, року добрим в'ни ше росгваряли.

А кед зос високей церкви дзвони задзвоньели,  
И хлопи ше а и жени з драги росходзели.  
Па до церкви на вечурню — кед ше позберали,  
Шицки ишли, доми свойо празни охабяли.

А лєм єдна стара сама у хижї остава,  
Давно єй сгаснути очи и слабосц нє дава,  
Же би вона нєдальєку церкву походзела,  
Же би там на щятим месте Богу ше модльела.

Жаль ей, алье вона себе сама уцешує:  
»Та досц сам ше находзела« — цихо пришептує,  
»А тараз льем чекац мушим, док Вишнѣ повола  
Там ме горе аж гу себе — до своего стола.

Седем роки уж нье видзим — досц сом ше нажила,  
Льехко ше одселѣм, дзе ме вола Божа сила!« —  
Мирна вона на паточки кучи похильена,  
Спадла би ей задня слиза — кед є висушена.

Мирна шедзи и пацерки по рукох пребера,  
Од тей жеми и од ньеба рай вона вибера.  
Па модлѣ за дзеци свойо — благослов им схабя,  
Вецей ньемому образу, як живом' сподабя.

Так в'на слаба препадує, а швет ш' помладзує,  
Новом' ярньому животу шицко ше радує:  
Жито буйне и овес ше уж зажелѣнели,  
Древа голи з лѣстками ше млатким розлѣсцели.

По заграткох коло хижох квеце виквитало,  
Цо го дзивче любяци го марнье залѣвало.  
А рано ше бистра роса на квиткох блѣщала,  
Бояжлѣвим очком своѣм слунко щековала.

А воно ше споза жеми вельке указує  
Пречервене — и вше векше огньом загорює.  
Першираз на росквицену жем в'но попатрує,  
И як витрик уж по полю зарно сколѣскує.

Швица слунка рани зарѣ чупор овцох билих,  
Цо ше биля, ак щнѣх били кед окупал би их,  
И ходза по житку буйним — нѣско го спасаю,  
Баранчатка ровним польом мали виграваю.

Кед даєдно од мацери своєй ше одрадзи,  
Смутнѣ бечаци по овцох гльеда мацер вшадзи.  
Па кед ю вец спатри, гу нѣей бежаци ш' радує,  
При нѣей паше — од нѣей вецей ше нѣ отаргує.

А при овцох овчар стоѣ и на нѣх меркує,  
З куцовом их од люцкого своѣм обранює. —  
Слунко нѣско, и од жеми вше више одходзи,  
И вше вецей людзох вредних на польо доводзи.

Слунко горе — витрик шуци, житко ше колѣше,  
А шкорванчок з нього вильет и лѣци вше више.  
На початку уж зашпивал гласом як од меда:  
Раз жалошнѣ, раз весело — описац ше нѣ да.

*У Загребе 22. XII. 1903.    На пренеп. Зачат. Богород.  
Костелник.*





## Т О Л К О В А Н Ь Е.

1) Главна ми дума була, кед сом писал тоту писму, же бим приказал шумни и щашлѣви живот на валалѣе. Зато сом ей и дал мено «идилски венѣец.» А «венѣец» зато, бо сом повиберал шицки красни навики и тѣлесни и духовни, па сом их єдну з другу ягод до венца зязал зос першу строфу. (одламком). Гвари ше, же «нѣет щашлѣвого живота през щашлѣвей шмерци» па сом зато вжал процивно од молитви дзецка у I. шпиваню моли-тву старей жени у V., шпив. цо ше ма уж одселѣц зос тей жеми (ту сом баш думал мою покойну бабу — ей на спомино).

2) Правопис сом шицок хасновал *фонетички* (по гласу, як ше вигваря). Зато берем место *ы, і, ѣ* лѣем чисти *и*, бо ше у нас анѣ кус нѣе розлучую; па так исто место *льегки* пишем *лѣехки* и т. д.; *ѣ і ѣ* сом випушел, якцо то и други зробели, лѣем *ь* остал за помехчанѣе. У сом дзекеди одменьовал зос *н*, бо ше ище за-чуваки *ѣх* одменки *н*. пр. в нѣездею, в лѣеце. — Глѣедаци на-шол сом же ше *ѣх* и *ѣм* бере, кед ше сѣе наглашиц, а иньшак *их* и *им*. (А то ше так збуло, же н випадло).

3) У каждим языку за писми ше ище муша виводзиц слова, а поготово я мушел, дзе ми их нѣе доставало. Так на пр. од *орац* єст *орач*, па по тому од *шац* *шач*, исто так од *овѣи* *овчар*, *гуцац* *гук* и т. д.

Мушел бим ище вельо того писац, алѣе ту ми то нѣе за-даток, а тото мало, цо сом писал, най будзе *Богу на славя, а нам на хасен*.





**ДРУЖТВО ЗА РУСКИ ЯЗИК, ЛИТЕРАТУРУ И КУЛТУРУ**

**Нови Сад**

**З НАГОДИ 100-РОЧЊИЦИ ОД ВИХОДЗЕНЈА**

**(1904-2004)**



**Друковане репринт виданя**

**Идилского венца з *МОЙОГО ВАЛАЛА* Габра Костелника Гомзового помогли:**

**ПОКРАЊНСКИ СЕКРЕТАРИЈАТ ЗА ОБРАЗОВАЊЕ И КУЛТУРУ**

**НАЦИОНАЛНИ СОВИТ РУСКЕЈ НАЦИОНАЛНЕЈ МЕНШИНИ  
СЕРБИЈ И ЧАРНЕЈ ГОРИ**

**Нови Сад, 2004. року**

CIP - Каталогизација у публикацији  
Библиотека Матице српске, Нови Сад

821.161.2 (497.11) 14

**KOSTEL'NIK, Gavriil**

З мойого валала : идилски венџец / Габор Костелник Гомзов,  
– Репринт вид. – Нови Сад : Дружтво за руски јазик, литературу и  
културу, 2004 (Нови Сад : FB Print). ? 48 стр. ; 21 cm

Тираж 500. - Фототипско изд.: Жовква : Печатња О. О. Василян, 1904.

**ISBN 86 902129-7-3**

COBISS.SR-ID 194464775

ŠTAMPARIJA



---

**Габор Костелник Гомзов: Идилски венџец З МОЙОГО ВАЛАЛА, репринт  
виданс. - Обсяг 3 друкарски табаки. - Тираж 500 прикладніки.  
- Друковала Друкарня - FB Print, Нови Сад, 2004. року**



ISBN 86-902129-7-3



9 798690 212971